



## PROCESSUS VERBALES CONGREGATIONUM GENERALIUM

### I

Congregatio generalis prima habita est sabbato, die 13 mensis octobris 1962, hora 9 ante meridiem, in conciliari aula Vaticanae Patriarchalis Basilicae S. Petri.

Patrum, qui primae congregationi generali interfuerunt, elenchus exarari non potuit, quia impossibile fuit praesentiae schedulas distribuere.

P. D. Hermenegildus Florit, arch. Florentinus, Missam lectam de Spiritu Sancto celebravit, qua absoluta, omnibus surgentibus, secretarius generalis, P. D. Pericles Felici, arch. tit. Samosatensis, ad altare S. Evangelii codicem detulit, quem super paratum thronum statuit.

Card. Eugenius Tisserant, primus e consilio praesidentiae, omnibus stantibus, precem *Adsumus...* recitavit.

Deinde, cum sedissent omnes, secretarius generalis, de mandato Praesidis, ex ambone Patres monuit de prima suffragatione facienda ad commissionum Concilii sodales eligendos.

Card. Achilles Liénart, ep. Insulensis, animadvertit Patres se invicem insufficienter cognoscere, ideoque opportunum esse suffragationes ad aliam diem remittere ut notitia de Patribus acquiri posset. Quidam ex Patribus plauserunt.

Card. Ioseph Frings, arch. Coloniensis, nomine suo necnon card. Iulii Döpfner, arch. Monacensis et Frisingensis, et card. Francisci König, arch. Vindobonensis, ad ea, quae card. Liénart dixerat, accessit. Quidam ex Patribus iterum plauserunt.

Post aliquod intervallum, secretarius generalis ex ambone monuit consilium praesidentiae petitionem accepisse, et rogavit ut intra proximam feriam II Patrum eligendorum elenchi, a conferentiis episcoporum confecti, ad secretariam generalem Concilii mitterentur.

Proximam congregationem generalem indixit pro feria III, die 16 octobris, hora 9.

Post breve intervallum, idem secretarius generalis monuit inter so-



dales commissionum eligi posse etiam Patres cardinales, partem non habentes in aliis commissionibus et in consilio praesidentiae.

Hora 10,30 congregatio finem habuit prece *Agimus...* a praeside recitata.

## II

Congregatio generalis secunda habita est feria III, die 16 octobris, hora 9 ante meridiem. Interfuerunt 2.358 Patres, nempe 79 cardinales, 8 patriarchae, 9 primates, 426 archiepiscopi, 1.726 episcopi, 10 abbates nullius, 12 praelati nullius, 88 superiores generales.

P. D. Casimirus Morcillo González, arch. Caesaraugustanus, Missam lectam de Spiritu Sancto celebravit.

Post Missam, Concilii secretarius generalis, P. D. Pericles Felici, arch. tit. Samosatensis, S. Evangelii codicem ad altare detulit et super paratum thronum statuit.

Card. Eugenius Tisserant, primus e consilio praesidentiae, omnibus stantibus, orationem *Adsumus...* recitavit.

Ab assignatoribus locorum Patribus opusculum distributum est, cui titulus: *Patrum Conciliarium indices sicut a conferentiis episcopalis exhibiti sunt ad commissiones S. Concilii eligendas.*

Card. Alfredus Ottaviani, loquendi licentia a praeside obtenta, ad electiones citius concludendas, proposuit ut maioritas, etsi relativa tantum, sufficeret.

Card. Franciscus Roberti animadvertit Codicem Iuris Canonici sapienter admittere maioritatem relativam tantum post duas suffragationes inefficaces.

Card. Ernestus Ruffini, nomine consilii praesidentiae, monuit non posse a Patribus mutari quod iam statutum erat a Summo Pontifice. Propterea suffragatio facienda erat, et eius exitus approbationi Summi Pontificis submitti posset.

Card. Tisserant eandem sententiam expressit.

Tandem Concilii secretarius generalis annuntiavit suffragationem faciendam esse iuxta normas statutas; postea, si necesse esset, postulatum card. Ottaviani ad Summum Pontificem deferri posse.

Item communicavit Summum Pontificem elegisse quattuor subsecretarios Concilii: Casimirum Morcillo González, arch. Caesaraugustanum, Ioannem Villot, arch. tit. Bosporanum, coadiutorem c.i.s. Lugdunensem, Ioannem Krol, arch. Philadelphensem Latinorum, Vilelmum Kempf, ep. Limburgensem.

Deinde monuit Patres schedas in aula vel domi conficere posse,